



REPUBLIKA E SHQIPËRISË
KOMISIONI I PAVARUR I KUALIFIKIMIT

Nr. 595 Akti

Nr. 640 Vendimi
Tiranë, më 5.4.2023

V E N D I M

Trupi gjykues i Komisionit të Pavarur të Kualifikimit, i përbërë nga:

Genta Tafa (Bungo)	Kryesuese
Valbona Sanxhaktari	Relatore
Lulzim Hamitaj	Anëtar

në prani të vëzhgueses ndërkombëtare, znj. Marie Tuma, asistuar gjatë procesit të vendimmarrjes nga sekretarja gjyqësore, znj. Jonida Vrana, në datën 5.4.2023, mori në shqyrtim, mbi bazë dokumentesh, çështjen që i përket subjektit të rivlerësimit:

SUBJEKTI I RIVLERËSIMIT: **Z. Skënder Mestani**, prokuror në Prokurorinë pranë Gjykatës së Rrethit Gjyqësor Lushnjë.

BAZA LIGJORE:

Neni 179/b i Kushtetutës së Republikës së Shqipërisë;
neni G i Aneksit të Kushtetutës së Republikës së Shqipërisë;

Ligji nr. 84/2016, “Për rivlerësimin kalimtar të gjyqtarëve dhe prokurorëve në Republikën e Shqipërisë”;

Ligji nr. 96/2016, “Për statusin e gjyqtarëve dhe prokurorëve në Republikën e Shqipërisë”;

Ligji nr. 44/2015, “Kodi i Procedurave Administrative i Republikës së Shqipërisë”;

Vendimi nr. 78, datë 12.12.2017, i Gjykatës Kushtetuese.

I. RRETHANAT E ÇËSHTJES

1. Subjekti i rivlerësimit Skënder Mestani gjatë periudhës së rivlerësimit kalimtar ka ushtruar detyrën e prokurorit në Prokurorinë e Rrethit Gjyqësor Lushnjë. Në zbatim të pikës 3 të nenit 179/b të Kushtetutës ky subjekt i është nënshtruar procesit të rivlerësimit *ex officio*.
2. Z. Skënder Mestani i është nënshtruar shortit të datës 15.6.2020, në përputhje me rregulloren e zhvillimit të shortit në Komisionin e Pavarur të Kualifikimit (në vijim Komisioni). Nga procedura e shortit rezultoi se procesi i rivlerësimit do të kryhet nga trupi gjykues i përbërë nga komisionerët Lulzim Hamitaj, Genta Tafa (Bungo) dhe Valbona Sanxhaktari, e cila u zgjodh edhe relatore e çështjes sipas shortit.
3. Menjëherë pas hedhjes së shortit, bazuar në nenet 33, 39 dhe 43 të ligjit nr. 84/2016, “Për rivlerësimin kalimtar të gjyqtarëve dhe prokurorëve në Republikën e Shqipërisë”, u

administrua raporti i hartuar nga institucioni i Inspektoratit të Lartë të Deklarimit dhe Kontrollit të Pasurive dhe Konfliktit të Interesave, Drejtoria e Sigurimit të Informacionit të Klasifikuar dhe Grupi i Punës në Këshillin e Lartë të Prokurorisë.

4. Trupi gjykues i shortuar pranë Komisionit vendosi fillimin e hetimit administrativ të thelluar dhe të gjithanshëm, sipas nenit 45 të ligjit nr. 84/2016, me qëllim vlerësimin e të gjitha fakteve dhe rrethanave të nevojshme për procedurën e rivlerësimit, si dhe caktoi kryesuese komisioneren Genta Tafa (Bungo). Të gjithë anëtarët deklaruan mosqenien në kushtet e konfliktit të interesit. Vëzhguese ndërkombëtare e caktuar për këtë çështje është znj. Marie Tuma.

5. Komisioni nëpërmjet postës elektronike njoftoi subjektin e rivlerësimit mbi fillimin e procesit të rivlerësimit kalimtar, përbërjen e trupit gjykues dhe i kërkoi të shprehej mbi konfliktin e interesit. Në vijim, subjekti i rivlerësimit me anë të postës elektronike deklaroi se nuk është në kushtet e konfliktit të interesit me ndonjë nga anëtarët e trupit gjykues.

6. Në vijim të procesit të rivlerësimit kalimtar dhe veprimeve verifikuese, trupi gjykues, me vendimin e datës 14.2.2023, në prani edhe të vëzhguesit ndërkombëtar, vendosi të mbyllë hetimin kryesisht për subjektin e rivlerësimit Skënder Mestani për të tria kriteret e rivlerësimit dhe e njoftoi atë për rezultatet e hetimit dhe të drejtën për t'u njohur me dokumentacionin e dosjes, kthimin e përgjigjeve dhe depozitimin e provave brenda datës 1.3.2023.

7. Z. Skënder Mestani, me anë të postës elektronike, në datën 27.2.2023, ka njoftuar Komisionin se në datën 23.2.2023 ka depozituar në Këshillin e Lartë të Prokurorisë dorëheqjen e tij nga funksioni i prokurorit pranë Prokurorisë së Rrethit Gjyqësor Lushnjë.

8. Në vijim të këtij procesi, Komisioni, me shkresën nr. *** prot., datë 28.2.2023, ka kërkuar pranë Këshillit të Lartë të Prokurorisë informacion mbi kërkesën e z. Skënder Mestani, si dhe vendimmarrjen e tij për këtë rast.

9. KLP-ja në përgjigje të kërkesës së Komisionit ka informuar se kërkesa e prokurorit Skënder Mestani është administruar dhe do të shqyrtohet në mbledhjen më të afërt që do të zhvillohet nga Këshilli. Në vijim, me shkresën e datës 6.3.2023, KLP-ja ka dërguar pranë Komisionit, bashkëngjitur, vendimin nr. ***, datë 6.3.2023, për deklarimin e mbarimit të statusit të magjistratit për z. Skënder Mestani, me detyrë prokuror në Prokurorinë pranë Gjykatës së Rrethit Gjyqësor Lushnjë, për shkak të dorëheqjes. Kjo dorëheqje i jep efektet e saj nga data 31.3.2023.

10. Komisioni, me shkresën e datës 28.3.2023, i ka kërkuar informacion Këshillit të Lartë të Prokurorisë nëse vendimi nr. ***, datë 6.3.2023, është i formës së prerë, i cili e ka informuar Komisionin me shkresën nr. *** prot., datë 4.4.2023, se vendimi nr. *** është përfundimtar dhe i formës së prerë nga data 31.3.2023.

11. Komisioni ka komunikuar nëpërmjet postës elektronike me subjektin e rivlerësimit Skënder Mestani, duke i kërkuar atij nëse dëshiron të marrë pjesë në seancë dëgjimore publike për të shprehur mendimin apo qëndrimin e tij lidhur me procesin e rivlerësimit kalimtar, i cili është shprehur se nuk dëshiron të marrë pjesë në seancë dëgjimore.

II. ARSYET PËR PËRFUNDIMIN E PROCESIT TË RIVLERËSIMIT

12. Procesi i rivlerësimit ndaj subjektit të rivlerësimit Skënder Mestani ka filluar në respektim të pikës 3 të nenit 179/b të Kushtetutës së Republikës së Shqipërisë dhe të pikës 4 të nenit 4 të ligjit nr. 84/2016, "Për rivlerësimin kalimtar të gjyqtarëve dhe prokurorëve në Republikën e Shqipërisë".

13. Trupi gjykues i Komisionit të Pavarur të Kualifikimit, pasi u njoh me rrethanat e çështjes, bazuar në provat e administruara më lart, konstaton se:

- i) Subjekti i rivlerësimit ka ushtruar funksionin e prokurorit pranë Prokurorisë së Rrethit Gjyqësor Lushnjë.
- ii) Procesi i rivlerësimit ndaj tij nuk ka përfunduar me vendim sipas pikës 1 të nenit 58 dhe me një nga masat disiplinore respektive sipas nenit 59 “konfirmimi në detyrë”, nenit 60 “pezullimi nga detyra dhe detyrimi për të ndjekur programin e trajnimit” dhe nenit 61 “shkarkimi nga detyra”.
- iii) Subjekti i rivlerësimit Skënder Mestani ka ushtruar të drejtën për heqje dorë nga funksioni i prokurorit.
- iv) Z. Skënder Mestani ka paraqitur kërkesën për heqje dorë pranë Këshillit të Lartë të Prokurorisë dhe ky i fundit me vendimin nr. ***, datë 6.3.2023, ka vendosur deklarinimin e mbarimit të statusit të magjistratit Skënder Mestani, për shkak të dorëheqjes. Ky vendim është i formës së prerë dhe ndaj tij nuk është ushtruar ankim nga z. Skënder Mestani.

14. Neni 65 i ligjit nr. 96/2016 “Për statusin e gjyqtarëve dhe prokurorëve në Republikën e Shqipërisë” ka parashikuar procedurën që duhet ndjekur për mbarimin e statusit të magjistratit nëpërmjet dorëheqjes¹.

15. Neni G i Aneksit të Kushtetutës së Republikës së Shqipërisë ka parashikuar mundësinë e subjektit të rivlerësimit për të dhënë dorëheqjen, si vijon: *“1. Subjekti i rivlerësimit mund të japë dorëheqjen nga detyra dhe në këtë rast procesi i rivlerësimit ndërpritet. 2. Subjekti i rivlerësimit që dorëhiqet sipas kësaj dispozite nuk mund të emërohet gjyqtar ose prokuror i çdo niveli, anëtar i Këshillit të Lartë Gjyqësor ose i Këshillit të Lartë të Prokurorisë, Inspektor i Lartë i Drejtësisë ose Prokuror i Përgjithshëm, për një periudhë 15-vjeçare”.*

16. Vendimi nr. 78, datë 12.12.2017, i Gjykatës Kushtetuese, paragrafi 43, ka interpretuar, ndër të tjera, lidhjen ndërmjet këtyre dy dispozitave, si vijon: *“[...] Neni 56 i ligjit i jep mundësinë subjektit që dorëhiqet brenda afatit 3-mujor, të përfitojë pagesë kalimtare sipas parashikimeve ligjore në fuqi, mundësi të cilën nuk e përfitojnë subjektet që e japin dorëheqjen pas përfundimit të këtij afati. Gjykata thekson se, për sa kohë që subjekti i rivlerësimit është në detyrë dhe procesi i rivlerësimit nuk ka përfunduar ende, ai ka të drejtën të japë dorëheqjen dhe në këtë rast procesi i rivlerësimit ndërpritet, duke u zbatuar parashikimet e nenit G të Aneksit të Kushtetutës [...]”.*

17. Në këto kushte, trupi gjykues çmon se subjekti i rivlerësimit ka shfrytëzuar të drejtën që i njeh Kushtetuta dhe ligji për dorëheqje nga statusi i magjistratit. Ndërprerja e procesit të rivlerësimit për shkak të dorëheqjes së subjektit të rivlerësimit sjell si pasojë përfundimin e kësaj procedure administrative dhe, si rrjedhojë, subjekti i rivlerësimit humbet të drejtën për t’u emëruar gjyqtar ose prokuror i çdo niveli, anëtar i Këshillit të Lartë Gjyqësor ose i Këshillit të Lartë të Prokurorisë, Inspektor i Lartë i Drejtësisë ose Prokuror i Përgjithshëm, për një periudhë 15-vjeçare, sipas parashikimeve të pikës 2 të nenit G të Aneksit të Kushtetutës². Po ashtu, subjekti i rivlerësimit nuk ka shprehur dëshirën për të marrë pjesë në një seancë dëgjimore publike.

PËR KËTO ARSYE,

Trupi gjykues i Komisionit të Pavarur të Kualifikimit, mbështetur në nenin G të Aneksit të Kushtetutës së Republikës së Shqipërisë, nenin 57 të ligjit nr. 84/2016, “Për rivlerësimin kalimtar të gjyqtarëve dhe prokurorëve në Republikën e Shqipërisë”, si dhe në nenin 64 të ligjit nr. 96/2016, “Për statusin e gjyqtarëve dhe prokurorëve në Republikën e Shqipërisë”,

¹ “1. Magjistrati mund të kërkojë mbarimin e statusit nëpërmjet paraqitjes së dorëheqjes para Këshillit përkatës. 2. Dorëheqja duhet të jetë me shkrim dhe nuk është e nevojshme të jetë e arsyetuar. Dorëheqja jep efektet në fund të muajit pasardhës, nga dita kur Këshilli merr deklarinimin me shkrim të dorëheqjes. Mbarimi i statusit të magjistratit deklarohet me vendim të Këshillit jo më vonë se dy javë nga mbarimi i statusit”.

² Komisioni në aplikimin e parashikimeve të pikave 1 dhe 2 të nenit G të Aneksit të Kushtetutës mban parasysh edhe praktikën e konsoliduar tashmë të Kolegjit të Posaçëm të Apelitit referuar vendimeve nr. 17/2021 (JR), datë 6.7.2021, për subjektin G. L. dhe nr. 36/2021 (JR), datë 24.11.2021, për subjektin A. G., etj.

V E N D O S I:

1. Të deklarojë ndërprerjen e procesit të rivlerësimit kalimtar për subjektin e rivlerësimit Skënder Mestani, prokuror në Prokurorinë pranë Gjykatës së Rrethit Gjyqësor Lushnjë.
2. Ndalimin e emërimit të z. Skënder Mestani si gjyqtar ose prokuror i çdo niveli, anëtar i Këshillit të Lartë Gjyqësor ose Këshillit të Lartë të Prokurorisë, Inspektor i Lartë i Drejtësisë ose Prokuror i Përgjithshëm, për një periudhë 15-vjeçare.
3. Ky vendim u njoftohet subjektit të rivlerësimit, Komisionerit Publik dhe vëzhguesve ndërkombëtarë, si dhe publikohet në faqen zyrtare të Komisionit, në përputhje me pikën 7 të nenit 55 të ligjit nr. 84/2016.
4. Kundër këtij vendimi lejohet ankim në Kolegjin e Posaçëm të Apelit brenda 15 ditëve nga data e njoftimit të tij dhe duhet të dorëzohet në Komisionin e Pavarur të Kualifikimit.

Ky vendim u shpall në datën 5.4.2023.

ANËTARËT E TRUPIT GJYKUES

Genta TAFA (BUNGO)
Kryesuese

Valbona SANXHAKTARI
Relatore

Lulzim HAMITAJ
Anëtar

Sekretare gjyqësore
Jonida Vrana